

Mbwk:
Liz nanz mbouj raennaj,
Daj denva bae cam;
Nanz lai mbouj raen ciep,
Ndiep lai ma ranz damq.
Sai:
Ndaejni denva yiengj,
Gou hix siengj bae dingq;
Hoeng ndang gou miz bingh,
Yaek ciep ning mbouj ndaej.
Mbwk:
Dingqnaeuz mwngz baenzbingh,
Mbouj sij saenq daeuj naeuz;
Baenzbingh naek rox mbaeu,
Mbouj heuh gou daeuj yawj.
Sai:
Seiz hainduj baenzbingh,
Siengj sij saenq bae naeuz;
Seizde bingh lij mbaeu,
Lau naeuz mwngz gwnheiq.
Mbwk:
Rox daengz beix baenzbingh,
Gou buekmingh dauq ranz;
Fwngz gaem fwngz caiq cam,
Baenz nanz rox ngamq baenz?
Sai:
Gaej gwnheiq lo nangz,
Mbwn sang mbouj ndaej gouq;
Caet ngoenz mbouj gwn haeux,
Lij baenz vunz mbouj baenz?
Mbwk:
Song fwngz gaem cenj caz,
Ndenq gvaq laj denzva;
Heuh beix mbouj hai da,
Gaem cenj caz dai maez.
Sai:
Deq nuengx aeu cenj caz,
Raemxda doek gwnz demx;
Bingh bienq yak mbouj ndei,
Miz maz vah couh daengq.

Fwen Damqbingh

探 病 歌

□ Luz Siucunh Veiz Ginjli /陆秀春 韦锦利

Mbwk:
Fwngz swix gaem cenj caz,
Fwngz gvaz daemz najbyak;
Noh mwngz ndat lumj feiz,
Seizlawz cij rox ndei?
Sai:
Gwnzmbwn daeuj diemj bouh,
Mbouj ndaej lix lo nangz;
Mbwn diemj bouh daengz gvan,
Baenz caeuz nangz doxbiek.
Mbwk:
Beix dai nuengx doengz dai,
Guencaiz doxnem baiz;
Baiz gwnz singz laj singz,
Aeu baizlingz doxcuiq.
Sai:
Mwngz aeu ndeindei youq,
Gou dai couh gag bae;
Dai couh banh sanglaex,
Geiq ndaej cangq ndok gou.
Mbwk:
Caih dai gonq dai laeng,
Daengz giuzyaem doxcaj;
Aengiuz guhdoi h gvaq,
Caj baenz sueng baenz doiq.
Sai:
Ndiep lai hix mbouj ndaej,
Daej lai vaih raemxda;
Mingh dinj mbouj buenx yah,
Gvanbaz yaek doxbiek.

Mbwk:
Ndiep dwg gou ndiep lai,
Dai couh gou dai riengz;
Ce gou gag youq biengz,
Cij mwngz gvaq yaem bae?
Sai:
Bae haw rox bae mbanj,
Lij ganj dauq goq maex;
Mingh dinj gvaqbae yaem,
Nanz ndaej raen doxdauq.
Mbwk:
Ciuq songraeuz cingzngeih,
Fanhseiq cungj mbouj raen;
Caih beix gvaqbae yaem,
Mwngz dai gou soujhauq.
Sai:
Gwnzmbwn sou gou dauq,
Nanz ndaej bauq aencingz;
Daengz dai seiz lo gou,
Hoengq souj aen baizlingz.
Mbwk:
Gou daengq mwngz aeu geiq,
Gaej gwnheiq lai gvan;
Seiqneix mbouj caemh ranz,
Dai baenz fangz guhdoi h.
Sai:
Gou dai mwngz aeu lix,
Vih mwngz gou gwnheiq;
Heiq mwngz gag ganq ranz,
Lij guenj gyoengq lwg'iq.

Mbwk:
Gouh dawh duenh bae ga,
Gvanbaz dai bae boux;
Ndek gou youq riengz laeng,
Diuq daemz dai cixbah.
Sai:
Gou dai mwngz doengz dai,
Mbwksai bouxlawz goq;
Bohmeh bouxlawz you,
Caeuz ngaiz bouxlawz cawj?
Mbwk:
Mwngz ansim bae yaem,
Fanh saeh cungj miz gou;
Bouxgeq caeuz lwgnyez,
Gyoengqde gou daeuj guenj.
Sai:
Gorangz hwnj daengz byongh,
Daengz duenh de couh reuq;
Mwngz baenz maiq lij coz,
Yousim mwngz gvaq hoj.
Mbwk:
Mwngz caih gou souj maiq,
Gwnzmbwn hix rox yawj;
Gvaq seiq haj bi dem,
Lwg raeuz rox danggya.
Sai:
Lwg raeuz caemh roxsoq,
Gijmaz cungj guh ndei;
Goq gyaranz raeuz miz,
Mwngz cien bi mbouj you.
Mbwk:
Gwnzmbwn caemh roxsoq,
Hix hawj raeuz miz lwg;
Lwg miz ndaej swnj ciuh,
Ciuhneix raeuz simcuk.
Sai:
Gwnzmbwn hix rox yawj,
Hawj gou caeuz mwngz gvaq;
Ciuhneix mwngz gaej lumz,
Gou vuenyungz beij doi h.

Lijyoz Auyinvei

里 约 奥 运 会

□ Vangz Gozgvanh/黄国观

Beix:
Lijyoz Auyinvei,
Miz geij bak ginhbaiz,
Guek raeuz ndaej geijlai,
Nuengx mwngz cai baez yawj.
Nuengx:
Lijyoz Auyinvei,
Miz ginhbaiz geij bak,
Seizneix guek raeuz ak,
Mbouj bak doeng geijcib.
Beix:
Gaiqgonq youq Lwnzdunh,
Ceng ndaej mingz daihngeih,
38 ginhbaiz,
Cwngqmingz guek raeuz maenh.
Nuengx:
Ceng ndaej gij ginhbaiz,
Vunzlai bouxboux rox,
Gaiqneix youq Lijyoz,
Ciuq soq ndaej lai gvaq.
Beix:
Gij ginhbaiz hainduj,
Guek raeuz bouxlawz ndaej?
Dwg danhangh aen lawz?
Nuengx gangj hawj beix dingq.
Nuengx:
10 mij gisoujciengh,
Dahsau Cangh Mungsez,
Vunz beij mbouj gvaq de,
Ginhbaiz ce de lingx.
Beix:
Gij ginhbaiz daihngeih,

Nuengx ngeix bouxlawz ndaej?
Dwg danhangh aen lawz?
Nuengx gangj hawj beix dingq.
Nuengx:
Minjyaz caeuz Dingzmau,
2 dah sau naengzganq,
Youq 3 mij diuqbanj,
Hangh neix ndaej ginhbaiz.
Beix:
Gij ginhbaiz daihsam,
Cam nuengx bouxlawz ndaej?
Nuengx yawj sinhwvnz caez,
Gaej naeuz mwngz mbouj rox.
Nuengx:
Geb miz 8 bi cingj,
Lungz Cinghceenz gingznaek,
56 goenggaen,
Caiq aeu ndaej ginhbaiz.
Beix:
Gij ginhbaiz daihseiq,
Song boux diuqraemx ndaej,
Songde dwg bouxlawz?
Nuengx naeuz hawj beix dingq.
Nuengx:
Cinz Aisinh Linz Yoz,
Dungcoz ndei dahraix,
Hangh 10 mij diuqdaiz,
Ginhbaiz dwg gyoengqraeuz.
Beix:
Daihhaiz gij ginhbaiz,
Nuengx cai bouxlawz ndaej,
Dwg danhangh aen lawz?



Fungsug gyanghaemh doxaeu Bouxcuengh Lingzyinz

Nuengx gangj hawj beix dingq.
Nuengx:
Hangh ap 200 mij,
Geijlai vunz doxsaiq,
Sunh Yangz ap ak lai,
Ginhbaiz dwg de ndaej.
Beix:
Daihroek gij ginhbaiz,
Nuengx cai bouxlawz ndaej?
Dwg danhangh aen lawz?
Nuengx gangj hawj gou dingq.
Nuengx:
63 goenggaen,
Raen gingznaek doxbeij,
Dahsau heuh Dwng Veih,
Doxbeij ndaej ginhbaiz.
Beix:
Daihcaet gij ginhbaiz,
Nuengx cai bouxlawz ndaej?
Dwg danhangh aen lawz?
Nuengx gangj hawj gou dingq.

Nuengx:
Yozlinz caeuz Veiyaz,
2 dah sau ak lai,
Hangh 10 mij diuqdaiz,
Ginhbaiz dwg gyoengq dawz.
Beix:
Daihbiet gij ginhbaiz,
Nuengx cai bouxlawz ndaej?
Dwg danhangh aen lawz?
Nuengx gangj hawj gou dingq.
Nuengx:
Daeg mbauq Siz Ciyungj,
Gijcung caen dwg haenq,
69 goenggaen,
De maenh ndaej ginhbaiz.
Beix caeuz nuengx:
Laeng lij miz ndei yawj,
Ciengjbaiz byawz aeu ndaej,
Cungj dwg hanhlwed lae,
Vih gyoengqde beikfwngz.